

## Presentada

GIAMPAOLO ATZEI  
Vice Presidenti de su Centro Studi SEA

Sa storia de s'omini est in profundidadi sinnalada de su sentidu de is viaggius: chi si trattit de unu disigiu de sa libertadi, unu scioberu o ancora una necessidadi, finzas de candu funt aparessius in sa terra is ominis viaggiant, is populus si disterrant, ammisturendusì in scobertas noas e mai connotas, spostendisì de unu continenti a s'atru, s'un prus comenti is pillonis de su celu, chi de sempri ponint in fattu is stasonis, sinnalendi aici is culturas de populus interus. Custa misura de movimentu in su spaziu, sa cultura e su tempus podit essiri arricia comenti una crai po liggi su sestu numuru de Ammentu, una rivista de giai lompia a su primu lustru de vida chi medas bortas hat propostu a is lettoris cosas de pensai in argumentus fortis presentis in custu momentu puru in d'unu dossier e duus focus distinctus: is culturas americanas, s'emigrazioni, sa lotta antifascista po sa libertadi e sa democrazia.

In sa prima chistioni su dossier *América: entre crònica y volatin de plumas* aberit un'occasione de scuberru de nou s'atobiu intra su Mundu becciu europeu e su Mundu nou americanu, liggiu in mesu a is articulus originalis chi andant de s'esamini de su spantu europeu poi is pillonis meravilliosamenti pintaus e su influiri insoru in is culturas indigenas, a sa biografia de dus ominis particularis: Geronimo de Aguilar, controversu conquistador spanniolu e Bartumeu de las Casas, su primu verdaderu defensori de is populus avvoltaus de sa conquista ispanica de su continenti nou.

Prus accanta in su tempus e in su spaziu est invecias su focus dedicau a s'emigrazioni italiana in s'Ottuxentus e su Noixentus *L'emigrazione capraiese a Puerto Rico nel XIX secolo e l'emigrazione italiana nel secondo dopoguerra: il caso dei flussi cilentano e sardo in Belgio e quello di Golfo Aranci attraverso le fonti comunali*.

Is articulus propositus ammostant in particolari diversas realidadi sardas e nazionalis significativas po completezza de is cartas e sviluppu de su fattu, comenti in su casu de is zonas de su Cilento e de sa Sardigna apustis sa sigunda gherra mondiali, medas bortas dirigia conca a su Belgiu de is minieras, intressendisì cun sa trista disgrazia de Marcinelle. Ddu i sunt cumprendias is esperenzias migratorias de is comunus galluresus de Logusantu e Golfo Aranci, miradas po mediu de su studiu de is documentus comunali, e considerationis apizzus de sa storia de s'emigrazioni de s'isula de Capraia finzas a Puerto Rico, chi aberit su focus.

A s'acabu su focus *L'antifascismo in Sardegna e fuori dall'isola: il caso di Iglesias e dei guspinesi Cornelio Martis e Pio Degioannis* chi ghattant luxi in s'impigniu politicu e is persecuzionis chi hant patiu, finzas a su martiriu, de paricius attivistas de sa zona mineraria sud-occidentali de sa Sardigna partendi de is istorias de is guspinesus.

*Presentada*